



18. april 2017

UPA 2017/159

Inatsisartut suleriaasiat §36 naapertorlugu apeqquteqaat aallaavigalugu oqallisissiaq imaattoq saqqummiuppara:

Qanoq qimmit qimuttut ikiliartuinnarnerat mumisinneqarsinnaanersoq qanorlu qimussertarnerup nukittorsarneqarsinnaanera pillugu apeqquteqaat aallaavigalugu oqallisissiasatut siunnersuut.

(Inatsisartunut ilaasortaq Villy Olsvig, Inuit Ataqatigiit)

Ukiuni kingullerni nunatsinni qimmit qimuttut ikiliartornerisa ammasumik oqallisigineqarsinnaanissaa inatsisartuni kissaatiginarpoq. Qanormita iliortoqarsinnaava qimmeqarnerup aammalu qimussertarnerup annertusaqqinneqarnissaanut.

Siullermilli saqqummiukkusunnarput Sisimiut / Qeqqata Kommuniiani ukiuni kingullerni qulit sinnilaarlugit qimmit qimuttut ikassusaasa nalunaarsorneqarsimaneri. Kisitsisimmi takutippaat 2003-miit 2016-mut qimmit 1905-niik 1081-iinnanngorsimasut, tassa affangajai. Ilanngussami A-mi takuneqarsinnaapput.

Qanorliuna iliornikkut qimmit qimuttut qimussertarnerullu annertusarsinnaanera iliuseqarfigineqarniarloq? Ilaatigu uku iliuserineqarsinnaasutut takorloopakka:

- Qimmeqartut utoqqaliartorput. Taamaammat meeqqanut inuusuttunullu paasissutissiinerulerneq ilinniartitsinerlu ingerlattariaqarparput qimussip qimmeqartarnerullu inooriaatsitsinnut qanoq pingaaruteqartiginera pillugu.
- Naalakkersuisooqatigiit isumaqatigiissutaanni allaqqasutuut inuutissarsiutigalugu qimmeqarneq soorlu aalisarnermut aammalu piniarnermut atorneqarnerisa sukumiinerusumik illersorneqarnissaat. Qimusserluni aalisartunut piniartunullu annertunerusumik pisassiisarnikkut piumassuseq qaffassarneqarsinnaavoq.
- Takornarissanik qimussiussisinnaanarup annertusarnissaa ilaatigut avammut nittarsaassinerunikkut.
- Takornarissanik qimussiussinermi immikkut tapiissutaasinnaasunik aaqqiisoqarsinnaanissaa.
- Akiuussutissamik kapuuisarneq iluaqutaanngitsoortarmat, qanittukkullu qimmerpassuit nappaateqarlutik toqararsimasut eqqaassagaanni, kapuut akiuussutissaq sakkortunerusoq atorsinnaaleqqullugu tapiisinnaasariaqarpugut.
- Meeqqat atuarfiini qimmeqarnerup aammalu qimussertarnerup kulturimut attuumassuteqarluinnartup sammineqartarsinnaanera kaammattuutigalugu.
- Illoqarfiit nunaqarfiillu qimmeqarfiusut timaani qamutinik motorilinnik angalasinnaanerit killilersimaarneqarnerunissaat, sunniutilimmillu nakkutilliinerusinnaasumik pilersitsisoqarnissaa suliniutigalugu.

Tassami assortuinnarneqarsinnaagunangikkaluarpoq qimmit qimuttut nunatsinni ikiliartorneri, silaannaammi kissakkiartornerata kingunerisaanik qimmeqaannarsinnaanissaq killilersimaarneqarpoq. Tamaattorli nunami maani ukiuunerani sila suli peqqarniittaqqimmat unamminartunillu nutaanik nassataqarluni, politikkikkut aalajangertariaqalerpugut inatsisitigut sinaakkutissatsinnik tulluarsaalluta pisariaqarfiusunilu tapiissuteqartariaqarpugut siuariarloqqilissappat.

Taamaaattorli qimmeqassuseq aammalumi qimussertartut ikiliartuinnassappata annaasassat annertupput, qimmeqarnermut tunngasut minnerunngitsumillu qimussernermet atortut/sakkut il il, suliarineqarsinnaaneri.